



Borgarráð

Reykjavík, 17. september 2024  
USK24090178

### Námsstyrkur Ellýjar Katrínar Guðmundsdóttur

Lagt er til að borgarráð samþykki að koma á árlegum námsstyrk í nafni Ellýjar Katrínar Guðmundsdóttur lögfræðings og fv. sviðsstjóra og borgarritara. Styrkurinn verði veittur einu sinni á ári í fimm ár fyrir meistararitgerð eða meistaraverkefni á sviði umhverfis- og/eða loftslagsmála. Í forgangi verði styrkir til verkefna eða ritgerða sem varða Reykjavíkurborg beint eða sveitarfélög almennt. Einnig er lagt til að borgarráð samþykki meðfylgjandi reglur um námsstyrkinn. Styrkurinn verður greiddur af umhverfis- og skipulagssviði Reykjavíkurborgar.

#### *Greinargerð:*

Ellý Katrín Guðmundsdóttir lögfræðingur starfaði hjá Reykjavíkurborg í tæp 20 ár, fyrst sem sviðsstjóri Umhverfisstofu, svo sem sviðsstjóri umhverfis- og samgöngusviðs og loks sem borgarritari. Ellý Katrín var frumkvöðull á sviði umhverfis- og loftslagsmála hjá borginni. Hún leiddi samþættingu samgöngu- og umhverfismála og sinnti alþjóðastarfi borga í loftslagsmálum og leiddi í því samhengi verkefni sem opnuðu opnuðu nýjar víddir fyrir borgina í umhverfismálum. Í kjölfarið setti Reykjavíkurborg fram sín fyrstu markmið til þess að draga úr útblæstri gróðurhúsalofttegunda. Þá voru fjölmörg verkefni er varða sjálfbæra þróun unnin undir forystu Ellýjar sem var samstarfsfólki sínu góð fyrirmynd og innblástur til góðra verka. Það er því vel við hæfi að minnast Ellýjar Katrínar með þeim hætti að efla ungt fólk og rannsóknir á sviði umhverfis- og loftslagsmála eins og hér er lagt til.

Einar Þorsteinsson  
borgarstjóri

Hjálagt: Reglur um námsstyrk Ellýjar Katrínar Guðmundsdóttur, drög.

## Námsstyrkur Ellýjar Katrínar Guðmundsdóttur

1. Styrkurinn heitir Námsstyrkur Ellýjar Katrínar Guðmundsdóttur og er nefndur eftir Ellýju Katrínu Guðmundsdóttur lögfræðingi og fv. sviðsstjóra og borgarritara. Tilgangur styrksins er að styðja við og hvetja til framhaldsnáms í umhverfis- og eða loftslagsmálum og efla þannig þekkingu á umhverfis- og loftslagsmálum til framtíðar. Hann er veittur vegna meistararitgerðar eða meistaraverkefnis. Veita skal styrkinn nemum sem sérhæfa sig í námi er varðar umhverfis- og/eða loftslagsmál.

2. Styrkféð er greitt af umhverfis- og skipulagssviði Reykjavíkurborgar. Að jafnaði skal veita einn styrk en styrknefnd er þó heimilt að skipta styrkfé í tvennt ef hún telur sérstakt tilefni til. Styrkurinn er veittur af borgarstjóra á fæðingardegi Ellýjar þann 15. september ár hvert í fimm ár, í fyrsta skipti árið 2025. Verðlaunafjárhæð er samkvæmt ákvörðun umhverfis- og skipulagsráðs hverju sinni í samræmi við fjárhagsáætlun.

3. Valnefnd er skipuð af umhverfis- og skipulagsráði til eins árs í senn. Hana skipa þrjú aðilar, þar af einn samkvæmt tilnefningu umhverfis- og skipulagsráðs Reykjavíkurborgar, einn samkvæmt tilnefningu sviðsstjóra umhverfis- og skipulagssviðs og einn samkvæmt tilnefningu frá háskólasamfélaginu. Sami einstaklingur má ekki sitja í valnefnd lengur en þrjú ár samfellt. Umhverfis- og skipulagsráð skipar formann valnefndar. Valnefnd skal skipuð áður en auglýst er eftir styrkumsóknum. Laun hennar greiðast af fjárveitingu umhverfis- og skipulagssviðs. Tilkynna skal borgarráði um skipan valnefndar. Valnefnd setur sér verklagsreglur sem hún vinnur samkvæmt og skulu þær vera í samræmi við Leiðbeiningar um málsmeðferð við úthlutun styrkja úr opinberum sjóðum, sjá [malsmedferd-vid-uthlutun-styrkja-ur-opinberum-sjodum.pdf \(stjornarradid.is\)](https://stjornarradid.is/malsmedferd-vid-uthlutun-styrkja-ur-opinberum-sjodum.pdf)

4. Auglýst skal eftir umsóknum um styrk fyrir 10. janúar ár hvert og skulu umsóknir berast umhverfis- og skipulagssviði fyrir 30. apríl á úthlutunarári. Valnefnd tekur ákvörðun um úthlutun styrks. Í forgangi til styrkúthlutunar eru verkefni eða ritgerðir sem varða Reykjavíkurborg beint eða verkefni sem varða sveitarfélög almennt. Sé valnefnd á einu máli um að engin umsókn fullnægi þeim kröfum sem hún telur að gera verði til styrkumsókna, má fella styrkveitingu niður það ár.